

畫要卷四
嘗繪太平圖一卷上獻

世廟嘉獎之又著有畫

法權輿傳世弟觀韞亦以詩画著名

聞人益字仲璣餘姚人御史銓之子也山水筆法瀟

灑無俗氣尤精扇頭小景其人亦拓落可喜

仇英字實甫號十洲太倉人山水人物師周臣工臨

摹落筆亂真至于髮翠豪金絲丹縷素精麗艷逸

無慚古人曾寫四大幅在弇州家一西園雅集一

清夜游西園一獨樂園一金谷園而獨樂園圖則

恢張龍眠之豪皆一丈有餘人物位置皆古偉余

家藏有種玉長卷筆法精研但以絹素損壞棄去

卓小仙蜀人善画好吟咏舉止異常嘉靖間寓番禺

時飲連盞吞復吐出或納片石于口須臾成銀以

給貧人郡守王公傲待之小仙微笑屏左右附耳

語王卽自失遜謝永豐王召見小仙書其屏曰披

衣兼跣足開口笑王侯千年渾是醉一世不梳頭

一日別衆去竟不知所之

韓方字中直號鶴仙歸德衛指揮善寫墨竹草蟲

蘇祥號小泉楊州人善人物山水